

19 APRIL 2018

## Sangkut di Nepal

30 setempat 19-04-2018

ifwan Tun Tuah ifwan@nstp.com.my

**Seremban**

**W**alaupun menyedari peluang untuk membawa pulang anaknya yang dihukum penjara selama 20 tahun di Nepal kerana menjadi keldai dadah tipis, Jamaluddin Malek, 66, tidak akan berputus asa dan terus berusaha.

Dia dengan sokongan Ketua Pemuda MCA, Datuk Chong Sin Woon giat mengumpul tandatangan orang ramai bagi menyokong petisyen meminta kerajaan negara itu mempertimbangkan untuk membenarkan anak sulungnya, Marina, 39, menjalani baki hukuman penjara 17 tahun lagi di Malaysia.

Jamaluddin berkata, dia mula mengumpul tandatangan orang ramai di sekitar kawasan perumahannya di Ampangan di sini, sejak bulan lalu sebelum bertemu Chong yang mencadangkan usaha itu turut dilakukan secara dalam talian bagi mendapat lebih banyak sokongan.

"Saya tahu usaha ini sukar, namun dimaklumkan ia tak mustahil.

"Jadi sebagai bapa, saya akan terus berusaha dengan apa saja cara untuk membawanya pulang," katanya di Bilik Gerakan MCA Parlimen Seremban di sini, semalam.

Pada 6 April 2015, dilaporkan Marina ditahan di Lapangan Terbang Antarabangsa Tribhuvan (TIA), Nepal selepas didapati cuba menyeludup kokaifi seberat 11 kilogram yang disembunyikan dalam lima komputer riba.

Media pada 25 Februari lalu melaporkan, Jamaluddin merayu kerajaan Malaysia dapat melakukan sesuatu bagi membawa pulang anaknya yang menjalani hukuman penjara selama tiga tahun daripada jumlah keseluruhan 20 tahun yang dikenakan kepadanya.

Jamaluddin berkata, anaknya ke Nepal bersama suami dan anak lelaki mereka berusia lapan tahun untuk bercuti pada pertengahan 2015.

"Selepas beberapa hari, dia meminta suami dan anaknya pulang terlebih dulu kerana ada urusan lain.

"Beberapa hari kemudian dia ditahan pihak berkuasa Nepal kerana didakwa membawa dadah sebelum dikenakan hukuman penjara selepas dibicarakan," katanya.

Menurutnya, selepas mengumpul wang selama tiga tahun, dia akhirnya dapat melawat Marina pada awal Februari lalu dan terlalu sedih melihat keadaannya yang kurus dan tidak sihat, selain terlalu merindui suami serta anak tunggal mereka.

Katanya, Marina yang sudah insaf menyesal dengan perbuatannya yang menyebabkan seluruh ahli keluarga bersedih selain anak lelakinya membesar tanpa kasih sayang seorang ibu.

Sementara itu, Chong berkata, petisyen itu diharapkan dapat membuka pintu rundingan antara pihaknya dengan kerajaan Nepal.

"Kami berharap ramai rakyat Malaysia memberi sokongan kepada usaha ini seterusnya menarik perhatian kerajaan Nepal memulakan perbincangan mengenai apa yang boleh dilakukan seterusnya," katanya yang meminta rakyat Malaysia mengambil iktibar dengan kejadian itu dan tidak terpedaya hingga menjadi keldai dadah.

Menurutnya, orang ramai boleh menandatangani petisyen itu di pautan <https://www.change.org/p/anak-malaysia-petisyen-kepada-kedutaan-nepal-di-malaysia-rayuan-membawa-pulang-marina-binti-jamaluddin>.

**FAKTA**  
Marina ke Nepal bersama suami dan anak lelaki untuk bercuti pada pertengahan 2015



JAMALUDDIN menunjukkan gambar Marina yang dipenjarakan di Nepal pada majlis sidang media di Bilik Gerakan MCA Parlimen Seremban.

# Sangkut di Nepal

■ Bapa ikhtiar bawa pulang anak dihukum penjara 20 tahun